

風濕不可汗下

論風濕不可汗下春夏之交人病如傷寒其人汗自出肢體重痛轉仄難小便不利此名風濕非傷寒也陰雨之後卑濕或引飲過多多有此證但多服五苓散小便通利濕去則愈切忌轉瀉發汗小悞必不可救初虞世云醫者不識作傷風治之發汗下之必死已未年京師大疫死正爲此予自得其說救人甚多壬辰年予守官洪州一同官妻有此證因勸其速服五苓散不信醫投發汗藥一夕而斃不可不謹也大抵五苓散能導水去濕耳胃中有停飲及小兒吐瀉

欲作癰服五苓散最効初君之說詳矣予因廣此說

以信諸人

信效方

取汗不可先期

南史記范雲初爲陳武帝屬官武帝有九錫之命在旦夕矣雲忽感傷寒之疾恐不得預慶事召徐文伯診視以實懇之曰可便得愈乎文伯曰便差甚易政恐二年後不復起耳雲曰朝聞道夕死猶可況二年乎文伯以火燒地布桃葉設席置雲於上頃刻汗解累以溫粉翌日愈雲甚喜文伯曰不足喜也後二年果卒夫取汗先期尚促壽限況不顧表裏不待時日

便欲速効乎每見病者不耐未三四日晝夜促汗醫者隨情順意鮮不敗事故予書此爲醫者之戒

本事方

傷寒舌出

臨安民有因病傷寒而舌出過寸無能治者但以筆管通粥飲入口每日坐于門一道人見之咨嗟曰吾能療此頃刻間爾柰藥不可得何家人聞而請曰苟有錢可得當竭力訪之不肯告而去明日又言之至于旬時會中貴人罷直歸下馬觀病者道人適至其言如初中貴問所須乃梅花片腦也笑曰此不難置即遣僕馳取以付之道人屑爲末摻舌上隨手而縮

凡用五錢病立愈

四時癘疾

周禮天官下曰疾醫長養萬民之疾病四時皆有癘疾春時有瘡首疾頭痛夏時有痒疥瘼秋時有瘡寒疾冬時有嗽上氣疾

辯沙病

沙病江南舊無今東西皆有之原其證醫家不載大凡才覺寒慄似傷寒而狀似瘡但覺頭痛渾身壯熱手足厥冷鄉落多用艾灸以得砂爲良有因灸膿血迸流移時而死者誠可憐也有雍承節印行此方云

初得病以飲艾湯試吐即是其證急以五月蠶退紙一片碎剪安枕中以牒蓋密以湯泡半碗許仍以紙封牒縫勿令透氣良久乘熱飲之就臥以厚衣被蓋之令汗透便愈如此豈不勝如火艾枉殘害人命敬之信之

葉氏錄驗方

暑氣所中

今歲熱甚聞道路城市昏仆而死者此皆虛人勞人或飢飽失節或素有疾一爲暑氣所中不得泄即關竅皆窒非暑氣使然氣閉塞而死也古方治暑無它但用辛甘發散疏導心氣與水流行則無害矣崇寧

乙酉歲余爲書局時一養馬僕馳馬出局下忽仆地
絕急以五苓大順散灌之皆不驗已踰時同舍王相
使取大蒜一握道上熱土雜研爛以新水和之瀉去
滓決其齒灌之少頃即蘇至暮此僕爲余復御而歸
乃知藥病相對有如此者此方本徐州沛縣市門忽
有板書釘其上或傳神僊欲以救人者沈存中王聖
美皆著其說而余親驗之乃使書百本散遠近庶幾
有救其急者也

石林老人
避暑錄

傷寒後睡不着

人病傷寒陽證或患熱疾服涼藥而得愈飲食未充

夜間輒睡不着是膽冷也若脉細身涼隨其虛實下
金液丹一服大冷者下百粒及五六十粒不甚冷者
三二十粒即睡着當以服證爲準也脉細微大便不
甚實小便清面色青白舌下不紅面帶青色皆冷證
也

醫
餘

傷寒差後之戒

傷寒病初差不可過飽及勞動或食羊肉行房事與
食諸骨汁并飲酒病方愈脾胃尚弱食過飽不能消
化病即再來謂之食復病方愈氣血尚虛勞太早病
即再來謂之勞復又傷寒食羊肉行房事並死食諸

骨汁飲酒者再病龐安常云飲酒者亦死

用藥不同

夫傷寒中風濕溫熱病瘧時疫雖同陰陽之法須別作治療若與傷寒同治必致危損經言脉有陰陽之法何也凡脉浮大洪數動滑此名陽脉也沉細澁弱弦微此名陰脉也陰病見陽脉者生陽病見陰脉者死審而察之

諸風

風者百病之始

風者百病之始也清靜則肉腠閉拒雖有苛毒弗能

害故病久則傳化上下不并良醫弗爲

中風用藥

凡中風用續命排風風引竹瀝諸湯及精神丹茵芋
酒之類更加以艾無不愈者然此疾積習之久非一
日所能致皆大劑久而取効唐書載王太后中風喑
默不語醫者蒸黃耆數斛以薰之得差蓋此類也今
人服三五盞便求効責醫也亦速矣孟子曰七年之
病三年之艾久而後知爾

本事方

中風

凡人中風脉無不大者非熱也是風脉也中風有冷

熱陽病則熱陰病則冷冷則用溫風藥熱則用涼風藥不可一槩用也凡中風皆不可吐出涎人骨節中皆有涎所以轉動滑利中風則涎上潮咽喉中滾響以藥壓下涎再歸骨節可也不可吐出若吐出涎時間快意積久枯了人手足不可不戒也小兒驚風亦不可吐出涎其患與大人同方其發搐搦時不可捉住手足則涎不歸手足而固疾成但當寬鬆抱之可也

醫餘

辯諸風證

頭風多饒白屑毒風面上生瘡刺風狀如針刺腰痛

如錐癩風急倒作聲發搐急慢頑風不認痛痒癰風
頸生斑剝暗風頭旋眼黑不辯東西瘡風面生赤點
肝風鼻悶眼瞶兩臉赤爛偏風口眼喎邪節風肢節
斷續指甲斷落脾風心多嘔逆酒風行步不前肺風
鼻塞項疼膽風令人不睡氣風肉內蟲行腎風耳內
蟬聲陰間濕痒寒濕脚氣癱風半身不遂痲風手足
拳攣胃風不伏水土虛風風寒濕痺暈風脫肛瀉血
腦風頭旋偏痛賊風發聲不響產風四肢疼痛骨風
膝腫如槌膝風腿寒骨痛心風健忘多驚盛風語言
蹇澁髓風臂膊酸疼臟風夜多盜汗血風陰囊濕痒

烏風頭回腫塊皮風紫白癰癰肌風遍身燥痒體風
身生腫毒閉風大便燥澀軟風四肢不舉綠風瞳人
開大青風吐極青盲虎風發吼羊叫大風成片爛瘡

諸風

劉子儀曰經有急風候又有卒中風候又有風癰候
夫急風與卒中理固無二指風而言則謂之急風指
病而言則謂之卒中其風癰蓋出於急風之候也何
者經云奄然忽不知人咽中塞窒然舌強不能言如
此則是中急風其候也發汗身軟者生汗不出身直
者死若痰涎壅盛者當吐之視其鼻人中左右上白

者可治一黑一赤吐沫者死

風痺

風痺者身無痛也病在臟四肢不收智不亂一旦臂
不隨者風痺也能言微有知則可治不能言者不可
治足如履霜肘如入湯股脛淫鏹眩悶頭痛時嘔短
氣汗出久則悲喜不常三年死凡欲治此病依先後
次第不得妄投湯藥以失機宜非但殺人因茲遂爲
痼疾當先服竹瀝飲子

雞峯普濟方

風瘓

經有風瘓候又有風角弓反張候瘓者身體強直口

噤如發癰狀角弓反張者腰背反折不能俯仰二者
皆曰風邪傷於陽之經而然也治法一同

腰腿

經稱腰腿風者爲四肢不收身體疼痛肌肉虛滿是
也以風邪侵於肌肉之間流於血脉之內旣云肌肉
虛滿即風邪入腎之經絡而然也水氣論曰諸腫俱
屬於腎是也治法當兼理腎爲得一云不治變爲水
氣

同上

風眩

夫風眩之病起於心氣不足胃中蓄熱實故有頭風

面熱之所爲也痰熱相感而動風風心相亂則悶瞤
故謂之風眩悶瞤大人曰癰小兒則爲癰一說頭風
目眩者由血氣虛風邪入腦而牽引目系故也五臟
六腑之精氣皆上注於目血氣與脉并上爲目系屬
於腦後出於項中血脉若虛則爲風邪所傷入腦則
轉而目系急故成眩也診其脉洪大而長者風眩也
凡人病發宜急與續命湯困急時但度灸穴便宜針
之無不差者初得針便灸最良

同上

風痺

夫痺者爲風寒濕三氣共合而成痺也其狀肌肉頑

厚或則疼痛此由人體虛腠理開則受於風邪也其邪先中經絡後入於五臟其以春遇痺者爲筋痺不已又遇邪者則移入於肝也肝痺之狀夜臥則驚飲食多小便數夏遇痺者爲脉痺血脉不流令人萎黃脉痺不已又遇邪者則移入於心心痺之狀心下鼓氣卒然逆喘不通咽乾喜噫仲夏遇痺爲肌痺肌痺不已後遇邪者則入於脾脾痺之狀四肢懈墮發咳嘔吐秋遇痺者爲皮痺則皮膚都無所覺皮痺不已則入於肺肺痺之狀氣奔喘痛冬遇痺者爲骨痺骨重不可舉不遂而痛骨痺不已又遇邪者則移入於

腎腎痺之狀喜張診其脉大澁者爲痺脉來急者爲痺脉澁而緊者爲痺

同上

偏枯

經有偏風候又有半身不遂候又有風偏枯候此三者大要同而古人別爲之篇目蓋指風則謂之偏風指疾則謂之半身不遂其肌肉偏小者呼爲偏枯皆由脾胃虛弱所致也夫脾胃爲水穀之海水穀之精化爲血氣潤養身體今脾胃虛弱則水穀之精養有所不周血氣偏虛爲邪所中故半身不遂或至肌肉

枯小爾治法兼治脾胃

皆雜
峯方